

Il nov album n'è nagin fiasco

Fiona Fiasco, resp. Fiona Cavegn, ha edì ses emprim album. Tenor Benedetto Vigne cun flair da star.

Ina chantautura cun in flair detg modern

Fiona Fiasco alias Fiona Cavegn publicitgescha «Forever Faking Memoirs»

BENEDETTO VIGNE

■ La chantautura e ghitarrista rumantscha Fiona Cavegn, respectiv Fiona Fiasco, ha publicitgà ses emprim album. Il musicist e publicist Benedetto Vigne ha tadlà il nov «disc» ch'i na dat atgnamain gnanc sco schibetta. Avant in tempet hai jau menziunà en ina columna da LQ che a la musica da pop e rock rumantscha manchia in pau ina tscherta «modernitad», vul dir che noss chantauturs e nossas chantauturas zoppegian per il solit davos ils trends dal temp, sa movan magari pulitmain daper il zeitgeist.

Ma i dat per cletg er excepziuns, pitschents hailaits en il detg grond microcosmos chantautural da la Rumantschia. In da quels è la giuvna musicista *Fiona Cavegn* da Breil che delectescha dapi passa

dus onns las tribunettas da Turitg e contuns cun sias chanzuns jazzusas bain ziseladas e ch'ha gia surprindì il mund «viral» cun ses videoclip feministic anti-bellet «Mona Lisa».

Nov num e nov duo

E quella chantautura e ghitarrista sursilvana ans surprinda uss cun ses emprim album polyglott «Forever Faking Memoirs», per rumantsch cirda «regords trumpants per adina». Gist davantor però las surpraisas relativas da l'ovra: Fiona na segna betg suletta l'album – ella vegn accumpagnada d'in musicist che sa numna pumposamain «Melodiesinfonie». Rumantscha è tiers quai – sco il titel lascha sminar – mo ina unica da las otg chan-



Fiona Fiasco & Melodiesinfonie: «Forever Faking Memoirs» (Radicalis/Bandcamp). FOTO M4D

zuns. E Fiona n'è betg pli Cavegn, ella ha tschernì per quest project il num d'art bunamain frivol Fiona Fiasco. «Quel tuna detg cool e va era bain a prà, i para che jau attir magari ils fiascos!» declera ella.

Cun daletg e stimol

Anc ina resalva: «Up to date» en il senn pli stretg è l'album be en sia tonalidà generala, stilisticamain sa mova il duo en las ausas d'in jazz d'apero atemporal, masdiglià cun zinslas da bossanova e tifs da chantinella scutinada franzosa, gea, perfin ina scappada en il beat da tecno tempriv aud'ins en la rimnada. E propi da vairas chanzuns na san ins betg discurre; ils tocs èn plitost ina spezia da textures repetitivas,

per part electronics, per part analogas, sur las qualas ils dus spondan vuschs e figuras, cun in daletg e stimol nunditg.

E quai davent da l'emprim track cun il bel titel «Brangelina Fanfiction»: Sur in loop da diversas tastadiras perlantas palaisa Fiona cun in sprechgesang lasciv-letargic che «plastic trees and yoga retreats mean nothing if you don't love yourself». Vul dir che tut las ritgezzas e vanitads da quest mund na valan nagut, sche ti n'has betg gugent tatez/za. E quell'aria autoconsienta feministica gira tras l'entir album. Il pli explicit en lez titel che stat sur ina skizza tropicalica cun trantertuns da blues: «Boys Suck» – per rumantsch schess'ins «buobs fan la chagia».

Züritütsch e rumantsch

Danor natiralmain il buob *Kevin Wettstein* – l'um davos la «Melodiesinfonie» – che cumplettescha cun ses maun jazzus il spiert liber da Fiona. El, ch'ha gia publicitgà diversas lavurs sco solist, surpiglia l'unic toc chantà gnugnond per dialect turitgais (cun ina strofa rumantscha da Fiona): «Ich hätt so gärn ich wär wo andersch». Tut insanua auter sa chatta er la chanzun finala «Pazienza ei clav»: Qua tuna digital be pli la leva bataria, e qua lascha Fiona crudar dal tut sias tempras frivolas, chantond en ina moda fitg pura, emozionala – sco sche rumantsch na fiss betg fatg per la decadenza. Ina musicista cun bleras fatschetas, gea, cun in flair da «star» vegnent. En in lieu confessa ella schizunt: «My name is melody mystery».

Sin vinyl ed en la rait

A propos da up to date: Moderna è er la publicaziun da l'album «Forever Faking Memoirs» – el cumpara be sco «vegli» disc da vinyl (reciclà!) ubain sco uschenumnà download digital (giu da la renumada plattafurma musicala «bandcamp»), pertge che discs cumpacts èn oramai totalmain or da moda. Ed er betg «sexy», tenor Fiona. Sin youtube entaup'ins dal reminent dus clips dal duo che illustreschan cun bier gust l'atmosfera da sia musica («Brangelina Fanfiction», «Je suis avec toi»).

Benedetto Vigne da Turitg è autor e schurnalist liber.